


ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՈՍՏԻԿԱՆՈՒԹՅԱՆ ՀԱՄԱԿԱՐԳԻ  
ՁԵՐԲԱԿԱԼՎԱԾ ԱՆՁԱՆՑ ՊԱՀԵԼՈՒ ՎԱՅՐԵՐՈՒՄ ՎԵՐԱՀՄԿՈՂՈՒԹՅՈՒՆ  
ԻՐԱԿԱՆԱՑՆՈՂ ՀԱՍԱՐԱԿԱԿԱՆ ԴԻՏՈՐԴԱԿԱՆ ԽՈՒՄԲ

№ 2621/1371

16.09.2013թվ.



ՀՀ ոստիկանության պետ,  
գեներալ-լեյտենանտ  
պարոն՝ Վ. Գասպարյանին

Հարգելի պարոն Գասպարյան,

Դիտորդական խումբը սույն թվականի սեպտեմբեր ամսին այցելություն է կատարել ՀՀ ոստիկանության Սյունիքի ՄՎ Միսյանի ՁՊՎ, որի ընթացքում արձանագրվել է.

Թերություն.

Դիտորդական խմբի 03.05.2013թ-ի թիվ 2245/1322 գրությանը ի պատասխան՝ 05.06.2013թ-ին թիվ 2/2-1-1660 գրությունով ոստիկանության կողմից եղել էր պարզաբանում ըստ երկրորդ պարբերության, մեջբերում ենք <<ՁՊՎ-ի խցերի պատուհանները չբացվելու ուղղությամբ միջոցառումներ են ձեռնարկվում>>, որից անցել է 4.5 ամիս և ոչ մի միջոցառում չի ձեռնարկվել ՁՊՎ-ի խցերի պատուհանների բացման ուղղությամբ:

Խախտում.

Ալեքսանդր Ալեքսանդրի Մանուկյանը ՀՀ ոստիկանության Սյունիքի ՄՎ Միսյանի ոստիկանության բաժին բերման է ենթարկվել 02.08.2013թ-ին ժամը 15<sup>40</sup>-ին, իսկ ժամը 16<sup>00</sup>-ին տեղափոխվել է ՁՊՎ առանց ձերբակալման և անհրաժեշտ փաստաթղթերի: Միայն հիմք է հանդիսացել դատավորի հետախուզում հայտարարելու որոշումը:

<<Ձերբակալված անձանց հաշվառման>> գրանցամատյանում Ա. Մանուկյանը ՁՊՎ է ընդունվել ժամը 15<sup>40</sup>-ին, բայց <<Ոստիկանության բաժին բերման ենթարկելու>> գրանցամատյանում ՁՊՎ է ընդունվել ժամը 16<sup>00</sup>-ին: Եթե հաշվի առնենք, որ ՁՊՎ-ի <<Ձերբակալված անձանց հաշվառման>> գրանցամատյանում նշված է արգելանքի վերցնելու

Ժամը, ապա կնկատենք, որ դա այդպես չէ. 15<sup>40</sup> ֆիքսված ժամը դա Միսյանի ոստիկանության բաժին բերման ենթարկելու և հենց բաժնում կազմված արձանագրության ժամն է:

Ավելացնենք, նաև, որ Ա. Մանուկյանը բերման է ենթարկվել Լոռու մարզի Ստեփանավան քաղաքից և ըստ պատասխանատու ոստիկանների հայտարարության՝ նրա տեղափոխումը Միսյանի ոստիկանության բաժին տևել է մոտ 6 ժամ:

Արդյունքում՝ Ա. Մանուկյանը 6 ժամ գտնվել է անազատության մեջ, առանց որևէ հիմնավորման, փաստաթղթերի կազմման, և միաժամանակ անհասկանալի է տվյալ ձևով գրանցամատյաններում տարօրինակ գրառումներ կատարելու նապատակը: */կից ներկայացվում է փաստը հաստատող լուսանկարներ-1,2, /*

Այսպիսով՝ խնդրում ենք ուսումնասիրել ներկայացրած փաստերը և տալ մեկնաբանություններ թերությունների և խախտումների վերաբերյալ:

Միաժամանակ խնդրում ենք Դիտորդական խմբի հրատապ հաշվետվություններին տալ առանձին մեկնաբանություններ՝ չընդհանրացնելով մարզի մնացած ՁՊՎ-ներում առկա հիմնախնդիրների հետ:

Հարգանքներով՝

ՀՀ ոստիկանության համակարգի ձերբակալված անձանց պահելու վայրերում վերահսկողություն իրականացնող հասարակական Դիտորդական խմբի նախագահ՝



Հ. Սահակյան



## ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՈՍՏԻԿԱՆՈՒԹՅԱՆ ՇՏԱԲ

375025, ք. Երեւան, Նալբանդյան 130 հեռ. 59-65-94

N- 2/2-1-

« \_\_\_\_\_ » \_\_\_\_\_ 2013թ.

Ձեր՝ 16.09.2013թ. թիվ 2621/1371 գր.

### **ՀՀ ոստիկանության համակարգի ձերբակալված անձանց պահելու վայրերում հասարակական դիտորդների խմբի նախագահ**

**Հասմիկ Սահակյանին**

#### **Հարգելի տիկին Սահակյան**

Հայտնվում է, որ դիտորդների խմբի կողմից ս/թ սեպտեմբեր ամսին ՀՀ ոստիկանության Սյունիքի մարզային վարչության Սիսիանի բաժնի ձերբակալվածներին պահելու վայր կատարած այցի ընթացքում արձանագրված թերությունները և խախտումները քննարկվել են ՀՀ ոստիկանության շտաբում և Սյունիքի մարզային վարչությունում:

Սյունիքի մարզային վարչությունում անցկացվել է ծառայողական քննություն, որի արդյունքներով պարզվել է.

1. ՁՊՎ-ի խցերի պատուհանները դեռևս շինությունը շահագործման հանձնելու պահից գտնվել են փակ վիճակում և նախագծով դրանց բացվելը նախատեսված չի եղել: ՁՊՎ-ի պատուհանները ՀՀ ոստիկանության համակարգում գործող ձերբակալված անձանց պահելու վայրերի ներքին կանոնակարգի 117-րդ կետի պահանջներին համապատասխանեցնելու համար անհրաժեշտ է իրականացնել շինարարական մեծածավալ աշխատանքներ, որի համար պահանջվում են ֆինանսական միջոցներ և որոշակի ժամանակահատված: Այսուհանդերձ, այդ ուղղությամբ աշխատանքները շարունակվում են և նշված ոլորտի պատասխանատու անձանց հանձնարարվել է միջոցներ ձեռնարկել կարճ ժամանակահատվածում ոստիկանության Սիսիանի բաժնի ՁՊՎ-ի խցերի պատուհանները վերը նշված իրավական ակտով սահմանված պահանջներին համապատասխանեցնելու ուղղությամբ:

2. **Ամբաստանյալ Ա.Մանուկյանը** խուսափել է ներկայանալ դատական նիստերին, որի հետևանքով դրանք մի քանի անգամ հետաձգվել են: Վերոգրյալի հիման վրա և ղեկավարվելով ՀՀ քրեական դատավարության օրենսգրքի 31-րդ, 151-րդ, 310-րդ և 313-րդ հոդվածներով, 17.06.2013թ-ին Սյունիքի մարզի ընդհանուր իրավասության դատարանը որոշում է կայացրել Ա.Մանուկյանի նկատմամբ ընտրված ստորագրություն չհեռանալու

մասին խափանման միջոցը փոխարինել **կալանավորմամբ** և վերջինիս հայտնաբերելու նպատակով նույն որոշմամբ նրա նկատմամբ հայտարարվել է հետախուզում: Հիշյալ որոշման հիման վրա 02.08.2013թ. ամբաստանյալ Ա.Մանուկյանը Ստեփանավան քաղաքից տեղափոխվել է Սիսիանի բաժնի ՁՊՎ, իսկ 05.08.2013թ. վերջինս ներկայացվել է դատարան, որտեղից էլ տեղափոխվել ՀՀ ԱՆ «Գորիս» ՔԿՀ:

Ինչ վերաբերվում է Ա.Մանուկյանին առանց որևէ հիմնավորման 6 ժամ անազատության մեջ պահելուն, ապա Ա.Մանուկյանին արգելանքի վերցնելու հիմք է հանդիսացել դատարանի որոշումը: ՀՀ քրեական դատավարության օրենսգրքի 138-րդ հոդվածի 1-ին մասի համաձայն, կալանքի տակ պահելու ժամկետը հաշվվում է դատարանի որոշումը կատարելու պահից, իսկ նույն օրենսգրքի 173-րդ հոդվածի 3-րդ մասի համաձայն, ժամկետն օրերով հաշվելիս ժամկետի ընթացքը սկսվում է առաջին օրվա գիշերվա զրո ժամից և վերջանում վերջին օրվա գիշերվա ժամը քսանչորսին:

Տվյալ դեպքում, ոստիկանության ծառայողների գործողություններն իրավաչափ են և նրանք գործել են օրենքի սահմաններում:

3. «Ձերբակալված անձանց հաշվառման գրանցամատյան»-ի 7-րդ սյունակում հերթապահ մասի պետի պարտականությունները ժամանակավորապես կատարող հերթապահ մասի ավագ տեսուչ-հերթապահ Վ.Գևորգյանը մեխանիկորեն ՁՊՎ տեղափոխելու ժամի՝ ժ.16.00-ի փոխարեն նշել է կալանավոր Ա.Մանուկյանին բաժին բերելու ժամը՝ ժ.15.40-ը, ինչը երևում է «Ոստիկանության մարմին բերման ենթարկվածների հաշվառման գիրք»-ը ուսումնասիրելիս: Հարկ է նշել, որ այս վրիպակով կալանավոր Ա.Մանուկյանի իրավունքները չեն խախտվել:

Այսուհանդերձ, Վ.Գևորգյանը խիստ նախազգուշացվել է՝ հետագայում նմանատիպ թերությունները բացառելու համար:

**ՀՀ ոստիկանության շտաբ**